

# NEWSLETTER



FONDACIJA  
HASTOR

decembar 2022.



# STIPENDISTICA MJESECA

## NEDŽMA LATIĆ

Fondacija Hastor može se pohvaliti marljivim, ambicioznim i uspješnim stipendistima koji ostvaruju zapažene rezultate na polju obrazovanja i nauke. Tim Fondacije čine mlađi volonteri koji doprinose njenom radu unapređujući ga svojim znanjem i vještinama. Upravo takve vrijednosti i predanost volonterskom angažmanu u okviru Fondacije Hastor iz mjeseca u mjesec stipendistima donose titulu Stipendiste mjeseca. U nastavku čitajte o **Nedžmi Latić**, stipendistici koja je tu titulu odnijela ovaj mjesec.

Čitanje i pisanje su intenzivno upoznavanje života, ali i posebna vrsta ljubavi. To nam otkriva i naša Nedžma koja svoju ljubav prema pisanom obliku riječi izriče pišući prozu i poeziju.

Nedžma Latić je studentica četvrte godine na Fakultetu menadžmenta i javne uprave na Internacionalnom Univerzitetu u Sarajevu, Odsjek za međunarodne odnose. Rođena je u Gornjem Vakufu, ali je veći dio svog života provela u mjestu Gračanica nedaleko od Bugojna. Ima 21 godinu i ovo je osma godina otkako je stipendistica Fondacije Hastor. Nedžma je još i prije fakulteta bila vrijedna i marljiva učenica, a u prilog tome govori i činjenica da je bila učenica generacije Elči Ibrahim-pašine medrese u Travniku. Takoder, kao studentica međunarodnih odnosa, uveliko se zanima za stanje na međunarodnoj političkoj sceni zbog čega, kako kaže, većinu slobodnog vremena provodi čitajući strane novine.

Nedžma je i članica redakcijskog tima Fondacije Hastor i svoje zadatke ispunjava odgovorno i predano pa njeni tekstovi vrlo često uljepšavaju stranice našeg Newslettera. Navodi da joj aktivnosti u redakcijskom timu Fondacije Hastor uveliko doprinose razvijanju talenta za pisanje. Kroz srednjoškolsko školovanje bila je i dobitnica mnogih nagrada na literarnim konkursima. Vrlo često piše poeziju za Newsletter Fondacije Hastor pa vam, ako već niste, toplo preporučujemo da zavirite na posljednje stranice i otkrijete magični svijet Nedžmine poezije.

Aktivan volonterski rad u okviru redakcijskog tima Nedžmi je donio titulu Stipendistica mjeseca, to je rezultat njenog zalaganja i truda kada je u pitanju pisanje tekstova za web-stranicu Fondacije Hastor, Newsletter, ali, onda kada je potrebno, i mnogih drugih tekstova za različite namjene. Nerijetko je potrebno preuzeti i više zadataka u toku jednog mjeseca što njoj, kako ističe, i odgovara jer to iskoristi da na svojevrstan način sve više i više brusi svoj kreativni duh, ali i da upozna druge vrijedne članove Fondacije Hastor.

Upitali smo Nedžmu za njeni iskustvi tokom volontiranja u okviru naše Fondacije, a ona je kazala sljedeće:

*Budući da u okviru Fondacije Hastor volontiram već duže vrijeme, moram priznati da sam na sebi osjetila promjenu kada je u pitanju moj lični pristup volonterskim aktivnostima s obzirom na to da sam osim u redakcijskom timu volontirala i na terenu s mlađim stipendistima, ali i u kancelariji Fondacije Hastor. S godinama se povećala moja svijest da za sva dobra koja mi je dala Fondaciji trebam uzvratiti onako kako najbolje mogu – volontiranjem koje će pomoći i meni i drugima. I dalje mislim da ne doprinosim dovoljno, ali se nadam da će ova moja posljednja godina dodiplomskog studija biti obilježena mnogim tekstovima za Newsletter i web-stranicu Fondacije, ali i drugim vidovima volonterskog rada. Vjerujem da je administracija Fondacije Hastor to uočila i ova titula je svjedočanstvo da nijedna naša aktivnost i ništa što damo Fondaciji ne ostane neuzvraćeno i neprimijećeno.*

Kako smo već i naveli, kroz svoje srednjoškolsko i fakultetsko obrazovanje bila je višestruko nagradjivana. Nedžma naročito ističe nagradu koju je dobila prije nekoliko godina, tačnije nakon završetka srednjoškolskog obrazovanja. Naime, Evropska unija u saradnji s Rijasetom Islamske zajednice u Bosni i Hercegovini organizirala je takmičenje na kojem su mogli učestvovati kreatori različitih umjetnosti, a tema je bila „Moje mjesto u EU“. Nedžma je zahvaljujući svojoj poeziji pobijedila u kategoriji pisanih radova te otputovala u Brisel gdje je sa svojim kolegama imala priliku prezentirati svoje radove.




U mjesecu novembru ove godine naša Nedžma je osvojila prvo mjesto na takmičenju koje je organizirao Fond „Bošnjaci“ o temi „Domovina je tamo gdje se osjeća sloboda“. Budući da je ljubav prema domovini najveća inspiracija za osobu poput Nedžme, imala je osjećaj da može ovu temu prikazati kroz lijep prozni tekst. Pored trideset i više dospjelih radova, Nedžmin rad je osvojio prvo mjesto zbog čega smo veoma ponosni.

Pored ove dvije nagrade, koje su Nedžmi iz trenutne perspektive najznačajnije, mnoge nagrade su se protkale kroz sve prethodne godine pisanja. Pisanje posebno voli jer uživa slušati razne percepcije rečenog kroz poeziju. Često se desi da zbog nečije analize i sama nađe novi pristup svojim pjesmama koje, kako ističe, *„čekaju da odrastemo zajedno i ako Bog da jednog dana ostavimo trag da smo postojale kroz zbirku poezije.“*

Na posljednjim izborima u Bosni i Hercegovini Nedžma je imala priliku prvi put raditi u svojoj budućoj struci, tačnije ispred OSCE-a bila je „tumač“ (interpreter) posmatračima iz Evrope. Kazala je da je imala priliku iz bližeg ugla vidjeti kako protiče izborni proces i stecći iskustvo u nečemu što je od velike važnosti za budućnost naše države.

Nedžma kaže da je na razvoj njene ličnosti i sazrijevanje uveliko utjecala razmjena studenata, tačnije program Erasmus+. Na trećoj godini školovanja imala je priliku boraviti u gradu Isparta koji se nalazi u Turskoj. Studirala je na Univerzitetu „Suleyman Demirel“. Pet mjeseci koje je provela u drugoj državi naučili su je samostalnosti i spremnosti za različite izazove. Ovo iskustvo joj je pomoglo i da unaprijedi poznavanje turorskog jezika.



Kada je u pitanju podrška Fondacije Hastor na putu njenog obrazovanja, Nedžma navodi:

*Fondacija Hastor je uz mene bila i na razmjeni. Budući da sam i tad, kao i danas, volontirala kao članica redakcijskog tima, mogla sam nesmetano izvršavati svoje volonterske obaveze. Lijepo je znati da Fondacija Hastor podržava našu želju za upoznavanjem nečeg novog i stranog. Trebalo je da odrastem kako bih shvatila ulogu Fondacije Hastor u mom školovanju i životu. Ona je onaj srednji put koji nam zafali kad ne znamo da li ići desno ili lijevo. Ona je ruka koja nas drži kroz oluje i nedaće kada udaljeni od sopstvenog doma proživljavamo, ponekad veoma teške, studentske dane. Ona je utočište koje smo svi našli u Sarajevu i prijatelj koji nikad nije okrenuo leđa. Svim stipendistima poručujem da dobro razmisle koliko dobra nama Fondacija Hastor daje. Svi zajedno moramo raditi na izgradnji svijesti o važnosti uloge Fondacije Hastor u našim životima. Fondaciju, hvala ti što je odrastanje uz tebe bilo mnogo lakše i što tvoju ljubav osjetim prisutnu u svakom segmentu svog*

Našoj Nedžmi želimo da u nastavku svog razvoja nastavi tkati svoj životni put hrabro i samouvjereno.



# RAM - RUBRIKA AKTIVNIH MLADIH

## AMINA BUKVAREVIĆ

Rubrika aktivnih mladih prostor je kroz koji svaki mjesec predstavljamo najvrednije stipendiste naše Fondacije. To su oni koji iz dana u dan nastoje svoje vrijeme i energiju uložiti u više ciljeve te na taj način poboljšati sebe, ali i svoje društvo. Onako kako je RAM (radna memorija) dio računara bez kojeg se njegov rad ne može ni zamisliti tako su i naši stipendisti, koji, pored volonterskog aktivizma u sklopu Fondacije, izuzetno marljivo rade i u svojim lokalnim zajednicama i time na najbolji mogući način predstavljaju Fondaciju Hastor i njenu misiju, dio bez kojeg naš rad zasigurno ne bi bio isti. RAM je rubrika posvećena onima koji svakodnevno aktivno rade na tome da poboljšaju svoje društvo i unaprijede sebe, stoga nam je zadovoljstvo svakog mjeseca govoriti o nekome od njih, a ovoga puta ta čast pripala je **Amini Bukvarević**.

Amina Bukvarević porijeklom je iz Kalesije i studentica je Medicinskog fakulteta, Odsjek zdravstvenih studija, smjer Medicinsko laboratorijska dijagnostika na Univerzitetu u Tuzli. Trenutno je na drugoj godini studija. Stipendistica Fondacije Hastor je od 2012. godine. Nastoji biti aktivna i pomoći u granicama svojih mogućnosti gdje god to može. Osim u okviru Fondacije Hastor, Amina volontira i u Udruženju „Ženo, majko, sestro“ i Udruženju „Osmijeh nade“.

Kao osoba koja mnogo voli djecu i raduje se druženju s njima, naša Amina uživa volontirati s mlađim stipendistima i djeecom s poteškoćama u razvoju. Veseli je i usrećuje svaki iskreni osmijeh djeteta.

Smatra da su to najiskrenija bića na svijetu koja pružaju čistu ljubav ne tražeći ništa zauzvrat. Za sreću im nije potrebno puno, traže je u jednostavnim i malim stvarima. Nadalje, od djece se mogu naučiti najvažnije pouke u životu. Djeca su nama odraslima najbolji dokaz da ne moramo uvijek biti spremni da bismo isli naprijed. Neustrašivost prema nepoznatom, uživanje u svakom trenutku života, beskonačna mašta, slobodan duh i ljubav prema svemu što oko vidi samo su neke od lekcija koje svi moramo naučiti od djece.



Osim volontiranja čitanje knjiga čija se tematika bazira na psihologiji mnogo je ispunjava. Smatra da psihologija ima mnogo toga korisnog za ponuditi.

Sve navedeno Amina vrlo uspješno balansira s redovnim šetnjama sa svojom prijateljicom iz djetinjstva te ističe kako vidi enormnu važnost u druženju i komunikaciji s dragim ljudima i smatra da društvene mreže ne mogu nadomjestiti čar razgovora uživo.


*Svaka promjena počinje i završava s nama. Zasigurno su mladi ti koji pokreću promjene u društvu te je veoma bitno imati proširene pogledе na dešavanja oko nas. Posjedovanje raznih vještina će nam pomoći u mijenjanju onoga što smatramo pogrešnim.*

Kada je Amina postala stipendista Fondacije Hastor, bila je sretna jer je dobila finansijsku pomoć za školovanje ne sluteći koliko će se zapravo emotivno vezati za sve ono što Fondacija jeste. Dobila je moralnu podršku, vjetar u leđa i motivaciju za sve što radi u životu. Postala je sigurnija u sebe i odlučnija u ostvarenju svojih ciljeva. Krenula je s izgradњanjem novih vještina, a počela je i da aktivno volontira i pomaže drugima.

*Fondacija Hastor me osvijestila da imam jedan život koji mi je dat. U tom životu imam mnoge prilike da pomažem, činim dobro i utičem na korisne i pozitivne promjene u društvu. Te prilike ne smijem propustiti jer svako od nas može da doprinese kreiranju bolje budućnosti. Fondacija Hastor me naučila da život nije vrijedan ukoliko ne dijelimo, ne poklanjamo, ne pomažemo i ne dajemo i zato joj veliko hvala na tome.*

*Moja poruka za stipendiste je da trebaju ulagati u svoje znanje i obrazovanje, biti produktivni, pomagati drugima oko sebe, graditi nove vještine i na taj način biti od koristi sebi, lokalnoj zajednici i društvu u cijelini.*

Stipendisti poput Amine nas redovno podsjećaju na ljepote volontiranja. Svakome od nas je lakše učiniti taj prvi korak ka aktivnosti u lokalnoj zajednici nakon što vidimo pozitivne primjere kojih je veliki broj unutar zajednice vrijednih ljudi Fondacije Hastor.



# ALUMNI MJESECA

## SALMIR ĆORALIĆ

Nakon okončanja školovanja stipendisti Fondacije Hastor ostaju vezani za Fondaciju kao korijen za svoje drvo. Takvo korijenje teško je pokidati zbog veze koja umije biti izuzetno čvrsta, neraskidiva i puna povezanosti, koja je ispunjena pozitivnim emocijama i predivnim sjećanjima na period školovanja koji je ostao iza njih. Tako bivši stipendisti Fondacije Hastor njeguju povezanost s Fondacijom koja je nerijetko bila njihov glavni oslonac i podrška u životu. Vrijeme prolazi i ljudi se suočavaju s raznim promjenama i mnoga sjećanja blijede kada se zamijene novim i interesantnijim događajima. Samo jedno u životu svakog stipendiste, ma u kojem životnom dobu bio, ostaje isto – privrženost Fondaciji Hastor. Ovog mjeseca donosimo vam priču bivšeg stipendiste Salmira Ćoralića koji je svoju uspješnu priču inženjera šumarstva nastavio u Njemačkoj gdje trenutno živi i radi sa suprugom i sinom.



Salmir Ćoralić dolazi iz Bosanske Krupe, gdje je završio osnovnu i srednju školu nakon čega je 2005. upisao Sumarski fakultet Univerziteta u Sarajevu. Master studij upisao je na istom fakultetu za što je u velikoj mjeri zaslužna upravo Fondacija Hastor čiji stipendista je postao u tom periodu.

Salmir je volontirao u Ključu u osnovnoj školi i kaže da ga za taj period vežu brojne divne uspomene koje će zauvijek biti utkane u stranice knjige njegovog života.

*Ljudi nekad imaju izvjestan strah od volontiranja jer misle da će izgubiti svoje vrijeme, međutim, to u stvarnosti nije tako. Za volontiranje u Fondaciji me vežu prelijepе uspomene koje ću pamtitи čitav život. Sa stipendistima sam učio, družio se, išao na izlete te sam čak upoznavao i neke od roditelja učenika s kojima sam volontirao. I danas se, nakon mnogo godina, često čujem s bivšim stipendistima koji su izrasli u uspješne ljudi i osnovali svoje porodice, kaže Salmir.*

Nakon uspješno završenog drugog ciklusa studija u decembru 2010. godine, Salmir se vraća u Bosansku Krupu, gdje počinje raditi u struci u Šumsko-privrednom društvu „Unsko-sanske šume“, gdje se zadržava osam godina.

Svoju ambicioznost želio je ispoljiti u Njemačkoj u koju se seli i tamo počinje raditi kao kontrolor stabala u kompaniji „Baumkontrolleur“, gdje i danas uspješno radi. Andrej Bitov govori da stablo nisu samo grane i lišće već i sjena ispod drveta i nebo kroz njih što bivši stipendista Fondacije Hastor Salmir potvrđuje svojom ljubavlju prema samoj prirodi i šumi bez koje ne bismo ni mi ljudi postojali. U svoje slobodno vrijeme Salmir nastoji što više boraviti u prirodi, pogotovo u ribolovu što ga emotivno ispunjava. Pored ribolova, amaterski se bavi i fudbalom. Članstvo u Fondaciji Hastor smatra velikom čašcu i ističe kako su mu iz tog perioda ostala samo lijepa sjećanja.

*Jako sam ponosan na to što sam bio stipendista Fondacije Hastor jer je Fondacija imala veliki značaj u mom životu i upravo sam zahvaljujući njoj nastavio svoje fakultetsko obrazovanje i upisao master. Vjerovatno to finansijski ne bi bilo moguće da nisam postao stipendista Fondacije Hastor jer mi je zaista Fondacija došla u pravom trenutku,* tvrdi Salmir.

Sjećanje koje mu je ostalo upečatljivo i koje će zauvijek ostati urezano u njegovom pamćenju je intervju za dodjelu stipendije kada je u razgovoru s timom Fondacije Hastor trebao predstaviti neke ideje koje bi bile zanimljive učenicima s kojima bi

*S obzirom na to da sam se i tada bavio ribolovom, imao sam viziju da učenicima predstavim rijeke Bosne i Hercegovine pa bih ih redovno upoznavao s novim rijekama i zanimljivostima koje se vežu za njih što sam kasnije kao stipendista i radio,* kaže Salmir.

Salmir ističe važnost volonterskih sastanaka i govori kako su mu upravo oni pokazali da se neka prijateljstva mogu roditi upravo na tim sastancima koji moraju imati dozu ljubavi i privrženosti pomaganju koje ih sve povezuje.





*“Druga priča Fondacije je da, pored finansijske podrške, stičemo brojna poznanstva i prijateljstva koja traju cijeli život. S mnogim stipendistima sam i danas u kontaktu i često se čujemo jer nas sve veže Fondacija Hastor i vrijeme koje smo proveli zajedno družeći se i volontirajući. Fondacija Hastor je nešto najbolje što svaka mlada osoba može da ima tokom svog obrazovanja jer nam kroz volonterski angažman omogućava da se i profilišemo u smjeru u kome želimo ići u budućnosti, vjeruje Salmir.*

Za stipendiste Fondacije Hastor Salmir ima poruku da nikad ne odustaju od svojih ciljeva.

*“Ako ste već došli da studirate, gledajte da maksimalno iskoristite to vrijeme koje imate za neke dobre stvari. Morate biti hrabri, iskoristiti sve prilike koje imate jer je period studiranja jedna velika prilika za sve vas. U životu ćete imati dosta padova, ali je najbitnije da nakon tih padova uvijek ustanete, zaključuje Salmir.*

Alumni Salmir Čoralić pokazuje da svoje ambicije, želje i ciljeve možemo ostvariti i u drugim zemljama izuzetno uspješno, ali je važno da na našem putu ka uspjehu uvijek čuvamo sjećanja na sve one ljude koji su nam na tom putu bili podrška.



# ZANIMLJIVOSTI

## SAZNAJMO NEKOLIKO ZANIMLJIVIH ČINJENICA O KONJIMA

Navikli smo dosad da u okviru naše rubrike „Zanimljivosti“ predstavljamo neobične i manje poznate teme ili pak da otkrivamo posebne karakteristike uobičajenih pojava s kojima se svakodnevno susrećemo. Ovoga puta donosimo nekoliko zanimljivosti o konjima i njihovom svijetu. Govoreći u najširem smislu, konji pripadaju porodici sisavaca u kojoj se danas nalazi isključivo jedan rod – Equus, a pripadaju im nama poznate podvrste kao što su magarci i zebre.

Kada je riječ o ovoj plemenitoj životinji, treba spomenuti i to da se od najranijeg doba konj koristio kao životinja za rad na polju zbog prednosti njegovih fizičkih osobina. U 21. stoljeću, i pored sve veće modernizacije i razvijene tehnologije, konji i dalje imaju fizičku ulogu u privredi, pogotovo u ruralnim područjima kakvim obiluje Bosna i Hercegovina. Mnoge porodice stiču svoje osnovne izvore prihoda iz poljoprivrednih aktivnosti u koje aktivno uključuju konje za vuču, ali i kroz turizam, organiziranje jahačkih tura, osnivanje konjičkih klubova i slično.

### KONJ U SPORTU

S obzirom na to da živimo u modernom vremenu, konj je dobio i drugu funkciju – sportsku. Samo jahanje kao sport predstavlja luksuz mnogima od nas, zahtijeva dosta vremena, pažnje, finansijskih ulaganja i drugih vrsta odricanja.

Također, postoje mnoge škole jahanja koje organiziraju individualnu i grupnu obuku. Jahanje predstavlja idealnu rekreativnu aktivnost za duh i tijelo. Naučno je dokazano da kontakt čovjeka sa životinjom ima mnoge benefite za zdravlje ljudi.

Konjske utrke apsolutno predstavljaju jedan od primjera prestiža i moći. Za ulazak u ovakav krug aktivnosti neophodno je da budete član plemenitije porodice ili pak da posjedujete pozamašne svote novca. Zanimljivo je kazati da se samo specifično dresirani konji koriste za utrke. Mnogi ljubitelji životinja ovakve aktivnosti smatraju mučenjem. Vrlo česta situacija jeste da se od većeg broja konja odabere samo nekoliko najboljih koji se u potpunosti

### ISHRANA KONJA

Omiljena hrana konjima su mrkva, jabuka, zob, ječam i raž. Također, veliki su ljubitelji šećera koji na njihovo zdravlje utiče baš kao i na ljudsko.

Također, voljeli bismo vas upoznati s još nekoliko zanimljivih činjenica o ovoj vrsti! Da li ste znali da konji mogu spavati i u ležećem i stojećem položaju te da su sposobni razlikovati emocije u ljudskom glasu?

❷ Konji su kao vrsta najzastupljeniji u SAD-u, a generalna brojka je između 65 i 75 miliona.

❸ U srednjem vijeku konj je kao jahača životinja bio dostupan isključivo plemićkim porodicama.

❹ Kada govorimo o životnom vijeku, poniji mogu dosegnuti dob čak više od 50 godina.

❺ Sigurni smo da ste upoznati sa sintagmom „konjska snaga“, a ista je nastala u Škotskoj. Njen autor je inženjer James Scott i prvi put je ovu sintagmu upotrijebio pri odredbi snage motora.

❻ Dobna starost ove snažne vrste može se odrediti i po kvaliteti njihovih zuba koje karakterizira sposobnost prirodnog zalijevanja.

❷ Kada spominjemo biološke karakteristike, vrijedi istaknuti da je njihov mozak veličine srednjeg krompira te je duplo lakši u odnosu na ljudski.

❸ Zanimljivo je kazati da konji svoje raspoloženje demonstriraju uz pomoć svog repa, baš poput pasa, a rep im se i veže i sve dok se ne osloboди, ne mogu ostvariti potpuni odmor.


❹ Na samom kraju vrijedi još dodati da se pojedini konji radaju crni, ali s godinama mogu dobiti bijelu boju.



# OBJEKTIV

## Belmin Sakić

Očistio park u blizini jezera u Bašigovcima



## Ali Imran Alić

Starijim komšijama dostavio ogrjev do njihovih stanova



## Ajdina Kadušić

Napravila sklonište za napuštene životinje



## Adna Čomor



Pomogla kolegici pri spremanju ispita iz predmeta Modeliranje poslovnih procesa



## Adelina Musić

Nahraniла napuštene pse



## IN MEMORIAM

S neizmjernim žaljenjem i tugom u ovom izdanju Newsletter-a prisjećamo se naše stipendistice Senade Mujić koja je preminula u mjesecu decembru 2022. godine. Ostat će upamćena kao vrijedna učenica i stipendistica koja u Fondaciji Hastor nikada neće biti zaboravljena.

# Senada Mujić

2003-2022

*Kada čujemo ime Senada uvijek nas podsjeti na nešto lijepo, pošteno i smireno. Djevojka koja je na našim volonterskim sastancima uvijek bila spremna za razgovor i saradnju. Bila je vrijedna učenica i stipendistica. Za nas je uvijek bila tu kad god bi nam zatrebala pomoći i zahvalni smo što smo imali takvu osobu u našim životima. Iako više nije s nama, u našim srcima živjet će vječno.*

Njene mentorice

*Kolektiv Fondacije Hastor ovim putem porodici, prijateljima i kolegama naše drage Senade izražava duboko žaljenje.*

# Očaj

Uradi čovjek u očaju ono što nikada ne bi,

pa ljubi neželjenog iz inata,

ne ljubi onog kog voli zbog ponosa,

ne prihvata srodnu dušu iz principa,

ne pokazuje ljubav iz straha.

Zažmiri na očite stvari,

potiskuje želje, potrebe,

hrli za prolaznim.

A zaboravlja da istinsku sreću čine sitnice.

Zaboravi čovjek prolaznost ovog života,

pa ne uživa u pravim vrijednostima.

Traži čovjek okeane, a kap mu je dovoljna

da bude sretan.

*Adelisa Begić*



**FONDACIJA**  
H A S T O R



#### Kontaktirajte nas!

Bulevar Meše Selimovića 16,  
Sarajevo  
033 774 789  
033 774 823  
[fondacija@hastor.ba](mailto:fondacija@hastor.ba)



#### Redakcija

Džana Vrabac  
Emra Kulo  
Aleksandra Đukić  
Almina Šabanović  
Nedžma Latić  
Amina Abaspahić  
Hana Kolasević  
Adelisa Begić



#### Grafički dizajn

Edna Porča



#### Naslovница

Aida Mujčin,  
"Snijeg"